

Parlamentarna skupština Bosne i Hercegovine bit će domaćin dvodnevnog ECPRD seminara na temu „Novosti u razvoju parlamentarnog nadzora“

23.9.2026 - | Parlamentarna skupština Bosne i Hercegovine

"Novosti u razvoju parlamentarnog nadzora" naziv je dvodnevnog ECPRD seminara koji će biti održan u zgradi Parlamentarne skupštine Bosne i Hercegovine 24. i 25. septembra 2026. godine. Parlamentarni nadzor je osnov demokratije i predstavlja jednu od najvažnijih funkcija Parlamentarne skupštine Bosne i Hercegovine (PSBiH).

Organizator ovog međunarodnog događaja je Sekretarijat PSBiH u saradnji sa Sekretarijatom Evropskog centra za istraživanje i dokumentaciju (ECPRD). Seminaru će prisustvovati više od 40 državnih službenika iz 25 parlamenata evropskih zemalja, kao i Evropskog parlamenta, koji će razmijeniti znanje i iskustva o različitim temama iz ove oblasti kao što su efikasnost i nove prakse, učešće građana, uloga opozicije i svjedoka, te zaštita podataka u parlamentarnom nadzoru.

ECPRD je osnovan 1977. godine i djeluje pod pokroviteljstvom Evropskog parlamenta i Parlamentarne skupštine Vijeća Evrope. Članovi ECPRD-a su predstavnici 63 parlamenta iz 52 uglavnom evropske države, kao i nekoliko vanevropskih država.

Ciljevi ECPRD-a su promoviranje razmjene informacija, ideja, iskustava i dobrih praksi među administracijama evropskih parlamenata o temama koje su od zajedničkog interesa, jačanje bliske saradnje među parlamentarnim službama u svim oblastima parlamentarne administracije, zakonodavstva, informiranja, istraživanja i dokumentacije.

Parlamentarna skupština Bosne i Hercegovine je članica ECPRD-a od 2006. godine, od kada njeni službenici učestvuju na seminarima i konferencijama. Parlamentarna skupština Bosne i Hercegovine kontinuirano sarađuje u razmjeni informacija na način da redovno priprema odgovore na upite o različitim temama koje parlamenti razmjenjuju putem elektronske ECPRD platforme.

Djelovanje ECPRD-a je podijeljeno na nekoliko oblasti, a seminar koji je organiziran u Sarajevu bit će održan u okviru oblasti „Parlamentarne prakse i procedure“. (kraj)

<https://www.parlament.ba/Publication/Read/35358?pageId=238&title=parlamentarna-skupstina-bosne-i-hercegovine-bit-ce-domacin-dvodnevnog-ecprd-seminara-na-temu-%E2%80%9Enovosti-u-razvoju-parlamentarnog-nadzora%E2%80%9C>